



ՎԱՐԴԱՆ ՍԱՐԿԱՎԱԳ ԲԱՂԴԱՍԱՐՅԱՆ

ՔՐԻՍՏՈՆԵՈՒԹՅՈՒՆԸ ՀԱՅԱՍՏԱՆՈՒՄ Ա.—Գ ԴԴ.
ԵՎ ՔՐԻՍՏՈՆԵԱԿԱՆ ԱՌԱՋԻՆ ՀԱՄԱՅՆՔԻ
ՍԿՋԲՆԱՎՈՐՈՒՄԸ ՍՅՈՒՆԻՔՈՒՄ

Նախագրիգորյան շրջանում Հայաստանում արդյո՞ք եղել են քրիստոնեական համայնքներ, թե ոչ, արդյո՞ք այդ շրջանում գոյություն է ունեցել քրիստոնեական եկեղեցի: Այս հարցին անդրադարձել են շատերը, որոնց կարելի է բաժանել երկու խմբի. ուսումնասիրողների մի զգալի մասը, ի գլուխ ունենալով Հայ Եկեղեցու պատմության հմուտ մասնագետ Մաղաքիա արքեպիսկոպոս Օրմանյանին, ընդունում է նախագրիգորյան շրջանի Հայ Եկեղեցու գոյությունը, որը ավանդական և դարերով նվիրագործված դիրքորոշումն է, իսկ մյուս մասը՝ ոչ:

Հայ Եկեղեցու ամենանվիրական ավանդություններից մեկն է Թադեոս և Բարթողիմեոս առաքյալների քարոզությունը Հայաստանում և նրանց հրաշագործ ձեռքով Հայ Եկեղեցու հիմնադրումը:

Սակայն այս ավանդությունը գրի է առնվել Ե դարում, քանի որ գրերի գյուտով է, որ սկիզբ է առնում հայ գրականությունը: Եվ այդ պատճառով էլ չորս-հինգ դար հետո գրի առնված ավանդությունը որոշ չափով կորցրել է իր սկզբնական պատկերը և հասկանալի է, որ շատ եղելություններ մոռացվել և կամ այլ գույն կամ տեսք են ստացել: Այդ հանգամանքն էլ, պարզ է, պատճառ է դարձել, որ ուսումնասիրողները փաստերին մոտենան տարբեր դիրքերից ու տարբեր մեկնաբանություններով հանդես գան:

Անցյալ դարի մի խումբ հայագետներ, «չգտնելով գոհացուցիչ փաստեր», սկսել են կասկած հայտնել հիշյալ ավանդության պատմականության վրա, մերժելով այն բացար-

ձակապես, «մինչև իսկ ուրանալով քրիստոնեության գոյությունը Հայաստանի մեջ՝ Գր. Լուսավորչի քարոզությունն առաջ»¹:

Սրանցից ոմանք, հիմնականում եվրոպացի գիտնականներ, նկատի էին առնում վերոհիշյալ ավանդության անհարապատությունը, ինչպես նաև հույն և լատին պատմագիրների լռությունը, մինչև մի ջարձ կաթոլիկ հայ վարդապետներ, հատկապես Վինենայի դըլարոցի ներկայացուցիչներ, կարծեք ավելի տարված հերքելու Մաղաքիա արքեպիսկոպոս Օրմանյանի այն տեսակետը, որ սույն ավանդության վրա է հիմնում Հայ Եկեղեցու ինքնագլուխ կալմակերպություն լինելու հանգամանքը, ամեն կերպ աջխառնում էին ժըխտել նախագրիգորյան շրջանի Հայ Եկեղեցու գոյությունը և այդ ճանապարհով նաև՝ Հայ Եկեղեցու ինքնագլուխ լինելը:

Հայաստանում նախագրիգորյան շրջանի քրիստոնեության գոյության ամենապորավոր հերքումը փորձեց կատարել Հ. Վարդան Հացունին², որը մեկ առ մեկ վկայակոչելով բոլոր նպաստավոր փաստարկները, դրանք բոլորն էլ համարեց անարժեք ու վիպային, ոչ թե գիտնականի անաչառությամբ, այլ Հայ Եկեղեցին նվաստացնելու կանխահայտ դիտավորությամբ: Նման ոչ գիտական ուղիով

¹ Հ. Պողոս Առաքյալ, Քրիստոնեության հետքեր Հայաստանի մեջ Ա. Գր. Լուսավորչի քարոզությունն առաջ, Վենետիկ—Ս. Ղազար, 1979, էջ 6:

² Հ. Վ. Հացունի, Կարևոր խնդիրներ Հայ Եկեղեցու Պատմության, Վենետիկ—Ս. Ղազար, 1927, Գլ. Ա, Հայ Եկեղեցին կա՞ր Լուսավորչէ առաջ, էջ 1—165:

առաջնորդվեց նաև Հ. Ս. Կոզյանը³, ջանալով ավելի պորացնել շեշտը և պատճառաբանությունները, ունենալով մեկ նպատակ, այն է՝ ամեն կերպ աջխառնել մերժել Օրմանյանի տեսակետը և ջանք ու եռանդ չխնայել ամեն տեսակ վարկաբեկիչ արտահայտություններով նսեմացնելու Հայ Եկեղեցու պատմության մեծ երախտավորի հեղինակությունը:

Կարծում ենք, որ պատմական փաստերից բացի, վաղ դարերի այն իրադարձությունները, որոնք իրար հաջորդեցին, լավագույնս հերքում են նրանց կարծիքը. նախ այդ ինչպե՞ս եղավ, որ Հայաստանում մինչև Ս. Գր. Լուսավորիչը բնավ քրիստոնյաներ չկային և հանկարծ Հայաստանը առաջինն է ընդունում քրիստոնեությունը որպես պետական կրոն: Այդ ի՞նչ հրաշք էր և ի՞նչ պորությամբ մի ողջ ժողովուրդ, որ բնավ չգիտեր՝ ինչ է քրիստոնեությունը, հանկարծ թողնում է իր դարավոր ու նվիրական ծեսերն ու կրոնը և դառնում քրիստոնյա:

Հայաստանում նախագրիգորյան շրջանի քրիստոնեության գոյությունը ժխտողները ստեղծում են մի անհիմն ու պատմական փաստերից պուրկ տեսություն, որ շատ ավելի առասպելական է ու վիպային, քան նրանց քննության ենթարկած ավանդությունները, որոնք, համենայն դեպս, իրենց մեջ պարունակում են պատմական հիմքեր և երբեք չեն հսկասում տրամաբանությանը:

Դեռևս Ընդհանրական Եկեղեցու այնպիսի նշանավոր հայրեր, ինչպիսիք են Տերտուղիանոսը (160—230) և ապա նրանից օգտվելով՝ Օգոստինոսը (354—430), անդրադառնալով «Գործք Առաքելոց»-ի «Ի Միջագետս, ի Հրեաստանի և ի Գամիրս» (Բ 9) արտահայտությանը՝ այն սրբագրել են «Ի Միջագետս, ի Հայաստան» (ընդգծումը իմն է. —Վ. Բ.) և ի Գամիրս» ձևով⁴, մի կարևոր հանգամանք, որ վկայում է հայերի՝ քրիստոնեության հետ ունեցած ամենավաղ շփման մասին: Տերտուղիանոսը Բ—Գ դարերի անձնավորություն է: Հետևաբար գոնե այդ շրջանում Հայաստանում պետք է անպայման քրիստոնյաներ եղած լինեին, որպեսզի նրան մղեին կատարելու նման սրբագրում:

Մի բան պարզ է, որ Տրդատ Գ-ի կողմից ընդունված նոր կրոնի պետականացման փաստը ինքնին հաստատում է, որ քրիստոնեությունը արդեն պետք է տարածված լիներ Հին Հայաստանում: Քրիստոնեության տարածման համար որոշ չափով հող էր պատ-

րաստված նախորդ դարերում և Տրդատ Գ-ի օրոք քրիստոնեության վերջնական հաստատումը դարձել էր հրամայական պահանջ: Միանգամայն ճիշտ է Հայկ Մելքոնյանը, որը, անդրադառնալով այս հարցերին, գրում է. «Քրիստոնեության մուտքը Հայաստան և նրա պետականորեն ճանաչումը Տրդատ Գ հայոց թագավորի և Գրիգոր Լուսավորչի ժամանակ ոչ պատահականորեն է տեղի ունեցել և ոչ էլ հրաշքների կամ բռնի հրամանների միջոցով, այլ քաղաքական, տնտեսական ու մշակութային նպաստավոր պայմանների ու իրադարձությունների շնորհիվ, որոնք նախապատրաստել ու անհրաժեշտ հող են ստեղծել հայ ժողովրդի շրջանում: Ամեն մի նոր գաղափարախոսություն, վարդապետություն կամ կրոն հաղթանակում է ու ամրանում այն դեպքում, երբ ժամանակի ընթացքում կենսական հենարան է ունենում»:

Նախագրիգորյան շրջանում Հայաստանում քրիստոնեության տարածման փաստի օգտին է խոսում նաև մեկ այլ կարևոր հանգամանք: Ինչպես հայտնի է, սկզբնական շրջանում քրիստոնեությունը համարվում էր հրեական մի աղանդ: Առաջին քրիստոնյաները դեռևս իրենց չէին անջատում հրեաներից: Բացի դրանից, հայտնի է նաև այն, որ նոր կալմակերպվող քրիստոնեական գաղափարախոսության առաջին քարուղիները քարուղելու էին մեկնում այն վայրերը, որտեղ կար հրեական գաղութ: Իսկ հրեաներ Հայաստանում պանգվածաբար բնակվում էին դեռևս հելլենիզմի դարաշրջանում՝ գաղթեցված Տիգրան Մեծի (95—96) կողմից⁵:

«Հայաստանի քաղաքներում պանգվածաբար ապրում էր հույն, ասորի և հրեա (ընդգծումը իմն է — Վ. Բ.), մասամբ էլ իրանական (պարթև, պարսիկ) ազգաբնակչությունը, որը բնակվում էր առանձին թաղամասերով՝ «ավաններով»: Հրեական Թավմուդի տվյալներից կարելի է ելրակացնել, որ հրեական համայնքը կազմում էր առանձին թաղամաս—«գաղութ» (galuta), որի գլուխ կանգնած էր «ռեսը»—res galuta: Այս թաղամասերը մինևույն ժամանակ կրոնական համայնքներ էին, քանի որ յուրաքանչյուր էթնիկական միավորը տարբերվում էր մյուսից նաև իր պաշտամունքով»:

Այս հրեական համայնքները, անշուշտ, ա-

⁵ Հայկ Մելքոնյան, Նորից եկեղեցական մի քանի հարցերի շուրջ, Հայ Եկեղեցու ծագումը, (անտիպ), էջ 3:

⁶ Հենրիկոս Գելլեր, Փաստոս Բիլանդ կամ Հայկական Եկեղեցույ սկզբնատրությունը, Վենետիկ—Ս. Ղապար, 1896, էջ 76:

⁷ Հայ ժողովրդի պատմություն, հտ. Ա, Երևան, 1971, էջ 811—812:

³ Հ. Ս. Կոզյան, Հայոց Եկեղեցին, մինչև Փյոնիս-տեան ժողովը, Բեյրութ, 1961, գլ. Ա—Գ, էջ 1—60:

⁴ Մաղաքիա արքեպ. Օրմանյան, Ազգապատում, Բեյրութ, 1959, Ա, էջ 22:

ռաջինը պետք է արձագանքեն նոր հանդես եկող քրիստոնեական գաղափարախոսությանը: Քրիստոնեությունը ընդունելուց հետո սրանց մի մասը հետագայում ձուլվեց հայերի մեջ⁸, իսկ այն մասը, որ պահպանեց իր ինքնությունը, Փ. Բուպանդի և Խորենացու վկայությունների համաձայն, հետագայում Հապուհ Բ-ի կողմից գերեվարվեց դեպի Պարսկաստան⁹:

Իր աշխատություններից մեկում Հայկ Մելքոնյանը ցույց է տվել¹⁰, որ Վաղարշ Ա թագավորի (51—75/81) օրոք պարթևների, հայերի, հրեաների, ասորիների և ընդհանրապես արևելյան այլ ժողովուրդների հարաբերությունները ընդլայնվել ու սերտացել էին և ստեղծվել էր նաև մի պինակցություն ընդդեմ Հռոմի: Պատերազմական գործողությունների ժամանակ Հռոմը ի վերջո տեղի է տալիս, և Վաղարշին հաջողվում է իր եղբայր Տրդատին նստեցնել հայոց գահի վրա: Այդ հաղթանակի համար իրենց հավատարիմ մասնակցությունը բերած շատ պինդորականներ, որպես վարձատրություն, ստանում են կարևոր պաշտոններ, պարգևներ ու նախարարական իրավունքներ: Նրանց մեջ էր նաև «հրեական» կրոնի, հետևորդ Համբատ-Բագարաթը¹¹: Հայկ Մելքոնյանը նույնիսկ գտնում է, որ «հրեական կրոն» ասելով պետք է հասկանալ այն վարդապետությունը, որը հետագայում ձևանջվեց «քրիստոնեություն» անունով¹²:

Այնպես որ Հայաստանում հրեական գաղութի առկայությունը դեպի այստեղ պիտի ձգեր քարուղիների, իսկ առաջին քարուղիներ կարող էին լինել, ինչու չէ, Թադեոս և Բարթողիմեոս առաքյալները, որոնք գործել են արևելյան երկրներում՝ Միջագետքում, Ասորիքում, Պարսկաստանում: Նրանք իրենց ձևապարհորդությունների ընթացքում անպայման մտած պիտի լինեին նաև Հայաստան և, ըստ ավանդության, այստեղ էլ նահատակված¹³:

⁸ Դուկաս վրդ. Ինձիճյան, Հնախոսություն Հայաստանի այդ աշխարհի, հտ. Ա, Վենետիկ, 1835, էջ 314:

⁹ Փառատոսի Բուպանդացու Պատմություն Հայոց, Վենետիկ, 1933, էջ 179: Մովսես Խորենացի, Պատմություն Հայոց, էջ 300:

¹⁰ Հ. Մելքոնյան, Աղիաբենի պետությունը և Հայաստանը, Երևան, 1980:

¹¹ Մովսես Խորենացի, Պատմություն Հայոց, գիրք Բ, գլ. է, էջ 109:

¹² Հայկ Մելքոնյան, Հայ Եկեղեցու ծագումը, էջ 5:

¹³ Վկայաբանություն Թադեոսի առաքելոյն, քարուղիների և գոյատևան ի Հայս, և կատարմանն որ ի Քրիստոս, «Սոփերք Հայկական» Ը, Վենետիկ, 1893: Վկայաբանություն սրբոյն Բարդողիմեոսի առաքելոյ, Սոփերք Հայկական, ԺԺ, 1854:

Հայկ Մելքոնյանը, վերը նշված իր աշխատության մեջ, հիմնվելով ասորական աղբյուրների վրա, կարողացել է ապացուցել, որ Թադեոս և Բարթողիմեոս առաքյալները իրոք եկել են Հայաստան և այստեղ քարուղի, և որ նրանց վերաբերող հայկական վարքերը ոչ թե հերյուրվել են կամ քարգանաություններ են ասորերենից, այլ բուն հայկական ավանդություններ են և հաստատվում են Փալեստոս Բուպանդի և Մովսես Խորենացու կողմից¹⁴:

«Մենք ունենք նաև ասորական աղբյուրների վկայությունը,—գրում է Հայկ Մելքոնյանը,—ըստ որի հայկական ավանդությունը իրենց ևս հայտնի է եղել և իրենք էլ խնայեցել են, որ Թադեոս առաքյալը Եդեսիայում քարուղեցուց ինտո գնացել է Հայաստան և այստեղ նահատակվել»¹⁵:

Ուսումնասիրողներին շփոթության մեջ է գցել հիմնականում այն հանգամանքը, որ հայ հին մատենագիրները լռություն են պահել նախագրիգորյան շրջանի վերաբերյալ: Սակայն պետք է նկատել, որ նույն մատենագիրները, սկսած Ե դարից, Հայ Եկեղեցու առաքելականության կետը միշտ պաշտպանել են և Գրիգորի հոջակել են Թադեոսի և Բարթողիմեոսի հաջորդ, ինչ որ չպիտի կարողանային անել, ինչպես ճիշտ կերպով եզրակացնում է Օրմանյան սրբապանը¹⁶, եթե առաքյալներից մինչև Գրիգոր Հայաստանում քրիստոնեություն չլիներ և Հայոց Աթոռը գոյություն չունենար: Եվ դեռ ավելին, վերջերս հայտնաբերված Ագաթանգեղոսի ասորերեն խմատոմ մի հին թարգմանությունը¹⁷ լիովին փարատում է մասնագետների կասկածը և էաստատում, որ Գրիգոր Լուսավորիչը փաստորեն եղել է Թադեոս առաքյալի գործի շարունակողը:

Այսպիսով, նախագրիգորյան շրջանում քրիստոնեության գոյությունը Հայաստանում կասկածից վեր է: Մեր նպատակից դուրս է այստեղ բերել Հայ Եկեղեցու նախագրիգորյան շրջանի գոյությունը ժխտող բոլոր փաստաթղթերը և մեկ առ մեկ պատասխանել դրանց: Մեր համոզումն այն է, որ նախագրիգորյան շրջանին վերաբերող մի շարք ավանդություններ, որ գրի են առնվել պատմիչների կամ վարքագիրների կողմից, ըստեղծվել են իրական դեպքերի հիման վրա

¹⁴ Հայկ Մելքոնյան, Հայ Եկեղեցու ծագումը, էջ 22:

¹⁵ Նույնը՝ էջ 24:

¹⁶ Մ. աղբեկ, Օրմանյան, Ագապատում, Ա, էջ 44:

¹⁷ Այդ մասին տես Հ. Մելքոնյան, Ասորական աղբյուրները Հայ Եկեղեցու մասին, Էջմիածին, № Է, Ժ—ԺԲ, 1978, էջ 173:

և իրենց մեջ պարունակում են ճշմարտության մեծ կորիզ: Ըստ այդ ավանդությունների, Թադեոս և Բարթողիմեոս առաքյալները Հայաստանում ունեցել են նաև իրենց կենտրոնները: Մեզ հասած բավաթիվ ավանդություններ ցույց են տալիս, որ Ա—Գ դդ. պատմական Հայաստանի Սյունյաց աշխարհում նույնպես բավական տարածված է եղել քրիստոնեությունը: Ընդ որում, Սյունյաց պատմիչ Ստեփանոս Օրբելյանը հիշում է ութ եպիսկոպոսներ, որոնք Բարթողիմեոսից հետո Ավետարանը քարոզել են այդ նահանգի մեջ: Դրանք են՝ Կումսի, Բաբելաս, Մուշե, որ հետագայում անցել է Արտաշի Աթոռ, Մովսես Տարոնեցի, Սահակ Տարոնեցի, Զրուանդատ, Ստեփանոս և Հովհաննես¹⁸:

Հ. Վ. Հացունին, իրեն հատուկ հեզնանքով, ժխտում է այս ավանդությունը և նրա վրա հիմնված բոլոր տեսությունները¹⁹: Կոզյանը, անշուշտ, ետ չպիտի մնար նրանից²⁰: Իսկ Հ. Պողոս Անանյանը, որ բոլորովին հակառակ կարծիք ունի և ընդունում է նախագրիգորյան շրջանի քրիստոնեության գոյությունը Հայաստանում, վարմանալի կերպով ոչ մի խոսք չի ասում Սյունյաց Աթոռի վերաբերյալ²¹:

Մաղսքիա արքեպ. Օրմանյանը իր «Հայոց Եկեղեցին» աշխատության մեջ, անդրադառնալով Հայ Եկեղեցու ծագման և սկզբնավորման հարցին, գրում է. «Ամեն եկեղեցիներու ծագումին վերաբերող եղելություններ անթափանցելի վարագույրի մը ներքև ծածկված են, և մեր հետապոտություններեն կխուսափին. որովհետև կապկսին այն վավերագիրերը՝ որոնք պիտի լուսարանեին առաջին առաքյալներուն գործերը, և ընդհանրապես բովանդակ առաքելական գործունեությունը: Հռոմեական Եկեղեցին ալ, որ այդ տեսակետեն ամենեն նպաստավոր դիրքն ունեցած է, քանի որ նույնիսկ կայսրության մայրաքաղաքին մեջ յուր ծագումն ստացած է, նա ալ ծանր դժվարությանց դիմաց կգտնվի, երբ որ հարկ կըլլա Ս. Պետրոս առաքյալին Հռոմի մեջ անցուցած ժամանակը ճշտել, մինչդեռ այս խնդիրը իրեն համար էական կետ մըն է, քանի որ անոր վրա կհիմնե բոլոր յուր վարդապետական կապածը: Այս պատճառով եկեղեցական պատմությունը, երբ ավելի հաստատուն փաստեր չգտնեն, կգոհանա առավելագույն հավանականության փաստերով, ավանդությանց վրա հիմնված պատմ-

ճառաբանություններով, և շարունակությամբ հաստատված եղելություններով: Բավական է, որ հավանականությամբ ցուցված կետերը յրականապես հաստատված և պատմությամբ ստուգված եղելություններու հետ հակասության մեջ չգտնվին: Ասկե ավելին պետք չէ պահանջել Հայոց Եկեղեցին ալ, իրեն ծագումը հաստատելու համար»²²:

Անշուշտ, եթե Հայ Եկեղեցու ծագման, և դեռ ավելին, ընդհանրապես բոլոր Եկեղեցիների ծագման վերաբերյալ պակասում են վավերագրեր, և այդ եկեղեցիների ծագումը և առաքելականությունը հաստատելու համար պետք է դիմել ավանդություններին, նույնիսկ մեծ Հռոմի աշխարհակալ Աթոռի կապակցությամբ, ապա ի՞նչ կարելի է ասել Հայաստանի լեռնային հյուսիսում, ժայռերի ու քարանձավների ծերպերում պատասպարված մի փոքրիկ քրիստոնեական համայնքի ծագման վերաբերյալ, որ դաժան հալածանքների այդ ժամանակներում, անհայտության մեջ, ճշմարտությունն ու առաքինությունը միակ պենք դարձրած, անցկացնում էր իր տառապալից, բայց գաղափարանվեր կյանքը՝ դարձած այն ցորենի ակնիվ հատիկը, որ իր բովանդակ կյանքը դնելով՝ պիտի տար բազում արդյունքներ:

Վավերագրեր չկան և ո՞րտեղից լինեն: Հեթանոսական Հայաստանից մեզ միայն չնչին թվով դրամներ և նյութական հուշարձաններ են հասել: Բայց մի՞թե պիտի ընդմիջտ մարեր դեռևս Դ դարում Ս. Գրիգոր Լուսավորչի ձեռամբ փարթամ ընձյուղներ տված և Սահակ-Մեսրոպյան հանճարով պտղակալած քրիստոնեության առաջին սերմերի ակնիվ հիշատակը... Ո՛հ, ժողովուրդը հիշում էր նրանց, հորից որդի պատմում նրանց կյանքի պատմությունը, հերոսական նահատակությունը, և ահա ստեղծվում են ավանդություններ, որոնք երբեմն ճոխանում են, ընդարձակվում, երբեմն մոռացվում կամ գրեթե մոռացության մատնվում, երբ առավել դաժան են լինում ժամանակները: Այդ ավանդությունները անփոփոխ չեն հասել մեզ, երբեմն տարբեր ավանդություններ համադրվել են, միացել միմյանց, երբեմն մի ավանդությունը ճյուղավորվել, տարբեր ավանդությունների հիմք է դարձել և այլն:

Ավանդությունները, ընդհանրապես, կարելի է բաժանել երկու հիմնական խմբի: Առաջին խմբի մեջ մտնում են այն ավանդությունները, որոնք իրենց խորքում պահպանել են որոշ պատմական փաստեր, իսկ երկրորդ խմբի մեջ մտնում են այն ավանդություններ-

¹⁸ Ստ. Օրբելյան, Պատմություն նահանգին Սիսական, Թիֆլիս, 1912, էջ 21—24:

¹⁹ Հ. Վ. Հացունի, նշվ. աշխատություն, էջ 108—115:

²⁰ Հ. Վ. Կոզյան, նշվ. աշխատություն, էջ 93:

²¹ Հ. Պողոս Անանյան, նշվ. աշխատություն:

²² Մ. արքեպ. Օրմանյան, Հայոց Եկեղեցին, Բեյրութ, 1912, էջ 19:

րը, որոնք հորինվել են, երբ կարիք է պահանջվել տվյալ եկեղեցու շահերը պաշտպանող փաստերի: Նույնն է նաև Սյունիքի քրիստոնեական համայնքի պարագայում, երբ տարբեր ժամանակներում կապվել են տարբեր պրոպագանդա և ավանդություններ: Այդ պատճառով էլ, բնականաբար, աղճատվել է պատմական իրականությունը և ուսումնասիրողի համար ստեղծվել դժվարին դրություն:

Նախագրի գործյան շրջանի Սյունյաց աշխարհի քրիստոնյաների վերաբերյալ մեզ հասած ավանդություններից, ինչպես ասվեց, առավել ուշագրավ է Ստեփանոս Օրբելյանի գրի առած ավանդությունը²³: Այն կապված է Բարթողիմեոս առաքյալի Հայաստանում ծավալած քարոզական աշխատանքների հետ²⁴:

Ըստ այդ ավանդության, Բարթողիմեոս առաքյալն իր աշակերտների հետ միասին Պարսկաստանից գալիս է Հայոց երկիրը, անցնում Երասխ գետը և մտնում Սյունյաց աշխարհ, քարոզում Որդվատ գյուղում, Արևիս գավառում, Բաղաց աշխարհում, և վերջապես՝ Գողթնում, հրաշքներ գործում, բազում հետևորդներ ունենում, ընտանյոք հանդերձ դարձի բերում գավառի իշխան Շարին²⁵: Օրբելյանը պատմում է, որ առաքյալը Գողթնում հիմնում է նաև մի եկեղեցի, եպիսկոպոս ձեռնադրում իր աշակերտներից մեկին՝ Կուսմիրին և նրան տեսուչ կարգում նորադարձ քրիստոնյաների վրա, «պի մի վերստին մոլորեցին ի կռապաշտութիւն»²⁶: Այնուհետև առաքյալը գնում է դեպի Վանանդ գյուղը: Ըստ ավանդության, այստեղ վախճանվում է իր աշակերտներից Լուսիկը, որի գերեզմանին շինում են փոքրիկ մատուռ, որտեղ «կատարին մեծ սքանչելիք և բժշկութիւն մինչև ցայսօր»²⁷: Այստեղ առաքյալը կործանում է նաև մի հեթանոսական բազին և տեղը եկեղեցի շինում՝ կոչելով Ս. Թովմայի անունով, որտեղ նույնպես «լինին բազում նշանք»²⁸:

Այնուհետև առաքյալը, ըստ Օրբելյանի պատմության, շարժվում է դեպի Դվին²⁹, իսկ ըստ վարքի՝ դեպի Թաղեոսի վիճակը³⁰:

²³ Ստ. Օրբելյան, Պատմութիւն նահանգին Միսական, էջ 21—24:

²⁴ Վկայաբանութիւն Սր. Բարթողիմեոսի Առաքելու, Սոփերք, ԺԹ, էջ 24:

²⁵ Ստ. Օրբելյան, Պատմութիւն նահանգին Միսական, էջ 21:

²⁶ Անդ, էջ 22:

²⁷ Անդ:

²⁸ Անդ:

²⁹ Ստ. Օրբելյան, Պատմութիւն նահանգին Միսական, էջ 22:

³⁰ Թաղեոսի վիճակը Հայաստանի Արտաշ գավառն էր, Վասպուրականի մեջ, որտեղ Թաղեոս առաքյալը

Այս ավանդությունը, որ դեռ ունի իր շարունակությունը, ինչ խոսք, պարզ չէ պատմական հիմքից, թեև այնտեղ կան վիպական որոշ տարրեր:

Կարծում ենք, որ Օրբելյանն ինքը խմբագրել է այդ ավանդությունը և գտել այն հնարավորին չափով վիպական տարրերից. վիպական տարրերից կարելի է համարել, թերևս, գավառի իշխանին և իր կնոջն ու ընտանիքին դարձի բերելու պատմությունը, որ հատուկ է բոլոր նմանատիպ ավանդություններին³¹:

Հ. Վ. Հացունին ոչ մի հավատ չի ընծառում ավանդությանը³² և ընդհանրապես գտնում, որ Ս. Բարթողիմեոս առաքյալը Հայաստանում չի եղել և ոչ մի քարոզություն էլ չի ծավալել այնտեղ: Իսկ Կոզյանը գրում է. «Հայ նախնական ավանդություն մը ի վուր կը փետրենք հայ հնագույն պատմագիրներու մոտ: Անոնք ոչինչ գիտեն Բարթողիմեոս Առաքյալի հսկայական առաքելականության մասին: Ազաթանգեղոս, Բուզանդ, Փարսեցի, Եղիշե—այնքան նախանձախնդիր հայ փառքերու—անձամբ են փառքին Բարթողիմեոսի քարոզական գործունեության հայոց մեջ»³³:

Այսպիսով, Կոզյանը անտեսում է «Վկայաբանութիւն սրբոյն Բարթողիմեոսի առաքելոյ» աշխատությունը³⁴: Բայց ինչո՞ւ նա չի հիշատակում Խորենացուն, որ իր գրքում պարզ ու հստակ գրել և հաստատել է. «Բայց վիճակեցաւ հայոց և Բարթողիմեոս առաքելոյ, որ և կատարեցաւ առ մեզ յԱրբանուս քաղա-

հիմնել էր եկեղեցի և որտեղ, ըստ ավանդության, գտնվում է իր գերեզմանը:

³¹ Օրբելյանը պատմում է, թե Որդվատ գյուղի ջուրը վնասակար էր և ամեն տարի հեղեղում էր այգիներն ու արտերը: Բարթողիմեոսը իր հետևորդների հետ աղոթում է, և ջուրը կտրվում է: Ինչ խոսք, երևում է, որ բուն ավանդությունը ավելի մանրամասն է եղել, վիպական տարրերով հարուստ, թե ինչպես էր ջուրը բարձրանում և հեղեղում այգիները, և ահա Բարթողիմեոսը, որ մինչ այդ հաջողություն չէր ունենում իր քարոզություններում, հանդարտեցնում է չուրը և սարսափահար ժողովուրդը երկրպագում է նրան, կարծելով, թե Աստված է: Բուն ավանդությունը գուցե ունեցել է նաև Բարթողիմեոսի խոսքը՝ ուղղված ժողովրդին: Նման պատումները, ընդհանրապես, հատուկ են բոլոր ավանդություններին: Բայց Օրբելյանը, ըստ երևույթին, խմբագրել է ավանդությունը, ամեն կերպ աշխատել համառոտել այն, տալով կարծեցյալ բուն պատմական եղելությունը՝ խուսափելով ավելորդ վիպական ձգձգումներից:

³² Հ. Վ. Հացունի, Կարևոր խնդիրներ, էջ 56—88:

³³ Հ. Ս. Կոզյան, Հայոց եկեղեցին, էջ 30:

³⁴ «Սոփերք Հայկական» ԺԹ, էջ 17:

քի»³⁵։ Գուցե նա կասկածո՞ւմ է իր համար «ոչ հին պատմիչ» Մ. Խորենացու՝ հայ փառքի նկատմամբ ունեցած նախանձախնդրության վրա։

Կոգյանը ոչ միայն կարևորություն չի տալիս Մ. Խորենացու այս վկայությանը, այլև անտեսում է առաքյալի՝ մեկ հասած վկայաբանությունը։ Ի վերջո, մի՞թե Բուպանդի, Փարպեցու և Եղիշեի լուրերը հիմք է տալիս անտեսելու Բարթողիմեոս առաքյալի վարքը։ Նրանք գուցե և լռել են այն պատճառով, որ արդեն գրված է եղել այդ մասին։ Ի վերջո մի՞թե բավական չէ երկու թանկահին աղբյուրների վկայությունը՝ համոզվելու համար, որ հայկական ավանդությունը, առաքյալի մասին, պատմական եղելություն է։ Պետք է նշել նաև, որ ասորի եկեղեցական մեծ գործիչ և նշանավոր պատմիչ Միքայել Ասորին նույնպես հաստատում է Բարթողիմեոսի Հայաստանի առաքյալ լինելը և գրում, որ Բարթողիմեոսը նահատակվել, խաչվել է Հայաստանում և թաղվել իր կառուցած եկեղեցում³⁶։

Հայկական ուրիշ ավանդություններ էլ կան, որոնք հաստատում են Բարթողիմեոս առաքյալի Հայաստան գալը։ Այսպես, ըստ մի ավանդության, Բարթողիմեոս առաքյալը հիմնում է Հոգեւոց վանքը և այն վերածում կուսանոցի՝ այնտեղ դնելով Աստվածածնի առաքելագործ պատկերը³⁷։

Իսկ մի այլ նվիրական ավանդության համաձայն էլ Ս. Բարթողիմեոս առաքյալը իր հետ Հայաստան է բերում Քրիստոսից ավանդ մնացած մեկ շիշ ապնիվ և անուշահոտ յուղ։ Եվ այդ յուղն է, որ միշտ նորի հետ խառնվելով, հասել է մինչև մեր օրերը՝ Ս. Մյուռնոս անվան տակ³⁸։

Հետաքրքիր է մեկ ուրիշ ավանդություն, որն ուղղակի կապված է Սյունիքի (Գողթնի) հետ։ Ավանդությունը գտնվում է Վարդան Արևելցու «Աշխարհացոյց»-ի ձեռագիր օրինակներից մեկի լուսանցքում, ուր գրված է. «Գ հատ մանանայ բերաւ ի Հայս ի սբ. առաքելոյն Բարթողիմեոսէ և եղ զայն տփով ի հիմն եկեղեցոյն, որ հանդէպ հայի Գող-

թան գաւառին, առ Երազխայ գետոյն, ի տեղ-տեղ, որ Մաղարթն կոչեն»³⁹։

Այս ավանդությունը, անշուշտ, պատմական հիմքից չուրկ է։ Մենք չենք ասում, թե իսկապես Բարթողիմեոս առաքյալը երեք հատ մանանա է բերել, տուփով դրել եկեղեցու հիմքում և այլն։ Բայց, այնուամենայնիվ, ավանդությունը իրենից հետաքրքրություն է ներկայացնում և չի կարելի հիմնովին ժխտել այն։ Ավանդությունը, ավելի ուշ շրջաններում, ծագել է Բարթողիմեոսի հայտնի բուն ավանդությունից և փաստորեն հաստատում է այդ բուն ավանդության գոյությունը։

Բարթողիմեոս առաքյալի Հայաստան գալը և այստեղ քարոզելը պատմական անուրանալի ճշմարտություն է և ոչ մի կասկած չի հարուցում։ Ճիշտ է, Եվսեբիոս Կեսարացին տեղեկություններ է տալիս նրա Հնդկաստան գնալու մասին⁴⁰, բայց այդ փաստ չէ, որ նա չի եղել նաև Հայաստանում։

Բարթողիմեոսը կոչված էր քարոզելու ոչ միայն Հնդկաստանում, այլև ամբողջ Արևելքում։ Հայկական վկայաբանության համաձայն, Հնդկաստանից հետո առաքյալը լինում է Բասրայում, Գերմանիկում, և այպա՝ «գնացեալ անտի սրբոյն եհաս յերկիրն Պարթևաց, և Մարաց, և Եղիմացոց, և քարոզէր նոցա զբանն կենաց»⁴¹։ Այս երկրներում լինելուց հետո «անցեալ գնաց ի Գողթն գաւառ Հայոց և փութացաւ հասանել ի վիճակ Թաղեոսի ըստ հրամանի Հոգւոյն սրբոյ»⁴²։

Այսպիսով, վարքն էլ հաստատում է Օրբելյանի գրի առած ավանդության այն վկայությունը, ըստ որի Բարթողիմեոս առաքյալը քարոզել է Գողթնում, հետևաբար նաև՝ Սյունիքում։

Ս. Բարթողիմեոս առաքյալի քարոզությունները Հայաստանում, ի մասնավոր Սյունյաց աշխարհում, անպտուղ չմնացին։ Արդեն վերևում տեսանք, որ առաքյալը Սյունյաց աշխարհում ունեցավ բազում հետևորդներ, դարձի բերեց նույնիսկ տեղի իշխանական տան անդամներին։ Սյունյաց առաջին տեսուչի՝ Բարթողիմեոսի կողմից ձեռնադրված Կոմսիի մասին այլ տեղեկություններ չունենք։ Կարելի է կարծել, որ իր բնական մահով է վախճանվել, քանի որ Օրբելյանը գրում է. «Յետ այսորիկ վախճանեցաւ (ընդգծումը իմն է—Վ. Բ.) Կոմսի»⁴³։

³⁵ Մովսես Խորենացի, Պատմութիւն հայոց, էջ 158։

³⁶ Տե՛ս Ժամանակագրութիւն Տեառն Միխայելի ասորւոց պատրիարքի, Յերուսաղէմ, 1871, էջ 101։ Տես նաև Հ. Մելքոնյան, Հայ եկեղեցու ծագումը, էջ 32։

³⁷ Մովսէսի Խորենացու Մատենագրութիւնք, Վենետիկ, 1843, էջ 295։

³⁸ Տե՛ս Թորգոմ աբեղա Փոստաճյան, Հայ եկեղեցւոյ ծագումն ու վարձացումը, «Հայրենիք» ամսագիր, 1955, մարտ, էջ 26—36։

³⁹ Մատենադարան, ձեռ. № 5128, էջ 187բ։

⁴⁰ «Եւսեբիոս Կեսարայայ եկեղեցական պատմութիւն», դպր. Ե, գլ. Ժ, էջ 364։

⁴¹ «Վկայաբանութիւն», էջ 22։

⁴² Անդ, էջ 24։

⁴³ Մտ. Օրբելյան, Պատմութիւն նահանգին Սիսական, էջ 22։

Արտապյան հիշատակարանը⁴⁴ Կոմսիի ժամանակակից Ջիմենտոս Հայրապետի մասին նույնպես գրում է, որ խաղաղ մահվամբ է վախճանվել. «Սա իբր չորս ամ հովուեաց պիտանացեալսն Բրիտոսի և վախճանեցաւ»⁴⁵ (ընդգծումը իմն է—Վ. Բ.): Հետևաբար կարելի է ենթադրել, որ քրիստոնեական առաջին եկեղեցին Հայաստանում, սկսելուց հետո, գտնվում էր համեմատաբար խաղաղ վիճակի մեջ, չկային լուրջ հակաժանքներ:

Կոմսիին հաջորդում է «վստմիկ ուն Բաբելոս անուն»⁴⁶: Սրա մահվանից հետո սյունեցիք Մուշե անունով մեկին ուղարկում են Թաղեոսի վիճակ՝ ձեռնադրվելու համար: Բայց այս Մուշեն, ինչպես գրում է պատմիչը⁴⁷, չի կարողանում սյունիք վերադառնալ: Սյունյաց համայնքը ընկնում է անտերունջ վիճակի մեջ:

Այնուհետև Օրբելյանը մի միջանկյալ միտք է արտահայտում, թե մինչև Ս. Գրիգոր Լուսավորիչը՝ Սյունյաց համայնքը մշտապես եկեթարկվել է հակաժանքների: Այս միջանկյալ նախադասությունից հետո հիշում է նա հինգ եպիսկոպոսներ՝ Մովսես Տարոնացի, Սահակ Տարոնացի, Զրուանդատ, Ստեփանոս և ապա՝ Հովհաննես⁴⁸:

Որոշ մասնագետներ Օրբելյանի միջանկյալ այս խոսքերը սխալ են ընկալել ու շփոթության մեջ ընկնելով՝ ձիշտ չեն մեկնաբանել և այլ ոինգ եպիսկոպոսներին տարել են Գրիգոր Լուսավորիչից հետո⁴⁹: Օրբելյանի Պատմության առաջին հրատարակիչ Կարապետ վրդ. Շահնապարյանն էլ, շփոթության մեջ ընկնելով, գրել է. «Ի գլուխ հինգերորդ ատե Ստեփանոս Օրբելյան թե՛ սուրբն Գրիգոր, յետ մկրտութեան իշխանին Սինեաց, ետ նմա պեպիսկոպոս ուն (որ թուի լինել Տիրիկես ատորի), և սակաւ մի ատորն ՎԳրիգորիս՝ պաշակերտն իւր: Մոռացեալ զկնի վոր ինչ գրեացն ի վերոյ, յաւելու աստէն թե՛ սուրբ Լուսավորիչն կացոյց ՎՄովսես Տարոնացի յառաջնորդութիւն Սինեաց և այլն: Ի

սկսբան 72 զվոյն դարձեալ կրկնէ ՎԳրիգորիս՝ առաջին եպիսկոպոս Սինեաց, կարգեալ ի սուրբ Լուսավորիչէն»⁵⁰:

Իսկուր է պատմության հրատարակիչը Օրբելյանին մոռացկոտ անվանում: Այդ ինչպես պատահեց, որ բազմահմուտ մատենագիրը հանկարծ մոռանում է ընդամենը հինգ ընդամենը, որ գտնվում էր նախորդ էջում: Միանգամայն ձիշտ է Մաղաքիա արքեպ. Օրմանյանը, որ նշում է, թե Լուսավորիչի անունը մի միջանկյալ ակնարկ է և թե Մովսես Տարոնացին, Սահակը, Զրուանդատը և այլն, Մուշեից հետո և Լուսավորիչից առաջ եղող եպիսկոպոսներ են⁵¹:

Կարծում եմ, չպետք է ոմանց շփոթության մեջ գցի այն հանգամանքը, որ Գողթնի Աթոռը մկրտում ենք «Սյունյաց» անվամբ: Իսկուր է Հ. Վարդան Հացունին հակադրվում Օրմանյանին՝ գրելով. «Ազգապատումի ճարտարություններն մին եղալ՝ Գողթան նախագրիգորյան անգո առաջնորդները «Սյունյաց եպիսկոպոսներ» ընել»⁵²:

Գողթնը այդ շրջանում Սյունյաց գավառներից մեկն էր, և չպետք է այն անջատել Սյունիքից: Հետագայում էլ՝ 450 թ. Աշտիշատում գումարված ժողովում և այնուհետև Դվինի 506 թ. ժողովում չեն հիշում Գողթան առանձին առաջնորդներ⁵³: Չ դարձում, երբ Գողթնը անջատվում է Սյունիքից, ունենում է նաև իր առանձին եպիսկոպոսը: Այսպես, Դվինի 555 թ. ժողովի մեջ Սյունյաց Պետրոս եպիսկոպոսի հետ հիշվում է Գողթան Հոյս եպիսկոպոսը⁵⁴:

Իրականությունն այն է, որ Գրիգոր Լուսավորիչի կողմից հաստատված Սյունյաց Աթոռը փաստորեն հանդիսանում է այս նախագրիգորյան շրջանի Գողթնի Աթոռի անմիջական շարունակությունը: Ստեփանոս Օրբելյանը ինքն էլ գրում է. «Բայց գիտեա՛լի ոչ եթե հատուածեալ էին սոքա ի Սինեաց, այլ յառաջն մինչդեռ ոչ էին հառադացեալ, և ոչ էին կարգած յաջաարիս Հացոյց եպիսկոպոսը, սոքա առանձին ունէին տեսուչա: Իսկ ի յուստորել սրբոյն Գրիգորի ՎՀայս, և ի կարգաւորել պարձ և վաստիճան եպիսկոպոսացն և զսոսա յանձնեաց եպիսկոպոսացն Սինեաց վի նոցա հրամանաւ և ի

⁴⁴ Արտապյան հիշատակարանն ասելով ի նկատի ունենք նախագրիգորյան շրջանում Արտապի Աթոռը (որ կոչվել է նաև Թաղեոսի վիճակ—աստ. ծնթ. 30) եպիսկոպոսների գավազանագիրքը, որ գտնվել է ԺԳ դարում գրված մի հիշատակարանի մեջ և տպագրվել «Արարատ» ամսագրում, 1868 թ.:

⁴⁵ Արարատ, Ա, 1868, էջ 102:

⁴⁶ Ստ. Օրբելյան, Պատմություն նահանգին Սիսական, էջ 22:

⁴⁷ Անդ, էջ 23:

⁴⁸ Նույն տեղում:

⁴⁹ Տե՛ս հատկապես Ե. Լաբյան, Գողթն, Թիֆլիս, էջ 31:

⁵⁰ Պատմություն նահանգին Սիսական, ի յոյս ընծայեց հանդերձ ծանոթագրութեամբ Կարապետ վրդ. Շահնապարեանց, Փարիս, 1859, հտ. Ա, էջ 318:

⁵¹ Օրմանյան, Ազգապ., Ա, էջ 55:

⁵² Հ. Վ. Հացունի, նշվ. աշխ., էջ 113:

⁵³ Եղիշեի Վասն Վարդանայ և Հայոց Պատերազմին, Երևան, 1957, էջ 27 և Գիրք թղթոց, Թիֆլիս, 1901, էջ 41:

⁵⁴ Գիրք թղթոց, էջ 73:

ներքոյ կացցեն հնազանդութեամբ. որում վկայ առաջին կաթողիկոսացն շրջաբերական թուղթք և հին գաւազան գաւառացն որ վասն հարկաց եկեղեցոյն, փի լիով ունի գրեալ յինքեան պետականոյ գաւառն Գողթան»⁵³: Այնուհետև Օրբելյանը, որպէսզի ավելի համոզիչ դարձնի իր խոսքը, ավելացնում է. «Նմանապէս և իշխանք Գողթան ոչ եթէ յայլմէ էին, այլ ի նոյն Սիսական ցեղէ, ըստ մասին ի ժառանգութիւն առեալ էին զայս գաւառ, որպէս ցուցանէր քեզ Մովսէս խորենացի»⁵⁴:

Այսպիսով, ըստ Սյունյաց պատմիչի հաղորդած տեղեկությունների, որոնք հաստատվում են նաև այլ ավանդությունների գոյությամբ, քրիստոնեական լույսը Սյունիքում ծագել է դեռևս նախագրիգորյան շրջանում, Ս. Բարթողիմէոսի կողմից, և այստեղ տևապէս գոյություն է ունեցել քրիստոնեական համայնք: Որքա՞ն միամիտ է հնչում Հացունու այն պատճառաբանությունը, թե դեռևս Գրիգոր Լուսավորչի և դեռ ավելին՝ Ս. Մեսրոպի ժամանակ Սյունյաց աշխարհը հեթանոս էր, էլ ուր մնաց՝ նախագրիգորյան շրջանում⁵⁵: Որ Մեսրոպի ժամանակ Սյունիքում, հատկապէս Գողթն գավառում, հեթանոս շրջաններ կային, այդ չենք ժխտում: Խոսելով Սյունիքում նախագրիգորյան շրջանի քրիստոնեության գոյության մասին, մենք չենք ասում, թե ամբողջ Սյունիքը քրիստոնյա էր: Ցանկանում ենք ասել այն, որ Սյունիքի որոշ բնակավայրերում, լեռնային շրջաններում և անմատչելի վայրերում, եղել են քրիստոնեական փոքրիկ համայնքներ կամ մեկ համայնք:

Սյունիքը միշտ էլ եղել է հակադրությունների երկիր: Ահա ինչ է գրում Ե. Լալայանը. «Գողթան գավառը թե՛ հեթանոսության և թե՛ քրիստոնեության շրջանում շատ ջերմեռանդ և ավանդապահ է եղել: Լեռնուտ, առանձնացած երկիր լինելով, այստեղ հեթանոսությունը կարողացել է պահպանվել մինչև

Ս. Մեսրոպի օրերը, ինչպէս և քրիստոնեությունը Ս. Բարդուղիմէոս առաքյալի քարուքոյթյամբ այստեղ սկսվելով կարողացել է հարստանել մինչև Ս. Լուսավորիչ»⁵⁶ (ընդգին է—Վ. Բ.):

Շատ հավանական է նաև, որ հավատացյալների մի մասը հայեր չէին, այլ՝ հրեաներ, հույներ, պարսիկներ, գուցե նաև ուրիշ տեղերից եկած և այստեղ հաստատված այլ անձնավորություններ կամ գործիչներ: Իսկ հալածանքների ժամանակ քրիստոնյաները պատսպարվելու թերևս ավելի հարմար վայրեր չէին գտնի, քան Սյունյաց դժվարամատչելի լեռներն ու ձորերը: Օրբելյանը Սյունյաց քրիստոնեական համայնքի մասին գրում է. «Սոքա կային մնային անտերունջք բնակեալ այս և անդր. և ոմանք ղողեալք ի լեռինս Գարուայ միայնաորութեամբ վկեանս իրեանց վարժէին զբազումս ուսուցանելով յորով ժամանակօք՝ մինչ ի գալ մեծի Լուսավորչին ի Հայս, և ի լուսաւորելն զամենայն աշխարհս Հայոց»⁵⁷:

Սյունյաց առաջին եպիսկոպոսի՝ Կումսիի անվան ծագումը անհայտ է: Գուցե նա հրեա էր կամ մի այլ ժողովրդի ներկայացուցիչ, որ Բարթողիմէոս առաքյալին միացել էր մինչև նրա Հայաստան գալը: Իհարկե, չի բացառվում նաև նրա հայ լինելը: Համենայն դեպս կարող էր լինել մոգերից մեկը, որ առաքյալի քարոզչության շնորհիվ նոր հավատքն էր ընդունել⁵⁸:

Բաբելասի համար ասվում է, որ «խուժիկ» էր, այսինքն՝ պարսիկ⁵⁹: Մուշե անունը հրեական Մովսէսի ասորական ձևն է⁶⁰: Հետագա հիշվող հինգ եպիսկոպոսներից մեկի անունը Չրուանդատ է, որը հավանաբար պարսկական անուն է, իսկ մնացած չորսինը՝ սուրբգրական անուններ են: Այս չորս անձնավորությունների ազգության հարցը դեռ չի լուսաբանված: Դժվար է կարծել, որ նրանք բոլորն էլ հրեաներ էին: Հավանաբար այդ ժամանակ արդեն սովորություն էր դարձել սուրբգրական անունների օգտագործումը:

⁵³ Ե. Լալայան, Գողթն, Թիֆլիս, էջ 31:

⁵⁴ Օրբելյան, Պատմութ., էջ 22:

⁵⁵ Վկայաբանութիւն սրբոյ առաքելոյն Բարդողիմէոսի, Սոփեք Հայկականք, էջ 24:

⁵⁶ Օրբելյան, Պատմութ., էջ 22:

⁵⁷ Տես Աճառյան, Անձնանունների բառարան:

⁵⁸ Ստ. Օրբելյան, Պատմութ., էջ 23: Դժբախտաբար Օրբելյանի հիշած այդ վավերագրերը կորել են, եթե ոչ՝ ավելի փաստացի աղբյուրներ կունենայինք ձեռքի տակ: Այնուամենայնիվ Օրբելյանը մեր ամենահավաստի և արժանահավատ պատմիչներից մեկն է և դժվար է կարծել, թե նա կեղծել է:

⁵⁹ Մուլն տեղում:

⁶⁰ Հացունի, նշվ. աշխ., էջ 111:

